

**UPA 2019/206: Uunga siunnersuut: Kalaallit Nunaanni eqqartuussisarnermik inatsisip
allanguutaa pillugu Inatsisartunit akuerineqarnissaa pillugu Inatsisartut
aalajangiiffigisassaattut siunnersuut**

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai

Inatsisartunut ilaasortaq Anders Olsen, Siumut, Siulittaasoq
Inatsisartunut ilaasortaq Sofia Geisler, Inuit Ataqtigiit, Siulittaasup tullia
Inatsisartunut ilaasortaq Aleqa Hammond, Nunatta Qitornai
Inatsisartunut ilaasortaq Justus Hansen, Demokraatit
Inatsisartunut ilaasortaq Stine Egede, Inuit Ataqtigiit

1. Siunnersuut pillugu

**1.1. Eqqartuussivimmi pinerluttulerinermi suliani killisiuinerni nipimik
immiussisarneq**

Puinerluttulerinermi suliani eqqartuussivimmi nassuiaanerit ullumikkut eqqartuussisup
allattaavianut naatsumik issuarneqartarput. Nassuiaatini immikkut pingaarutillit
itisiliiviunerusumik issuarneqartarlutik.

Pinerluttulerinermi suliani ilaatigut nassuiaatinut allaganngorlugit issuakkanut taarsiullugu
nassuiaatinik nipimik assinillu immiussisinnaanerup eqqunneqarnera siunnersuutip
nassataraa. Aaqqissuussineq taamaattoq Danmarkimi maanna ukiualunni
atuutereersimavoq.

Taamaalilluni nassuiaatigineqartut eqqoqqissaartumik tamakkiisumillu uppernarsaaserneqarsinnaaneri qulakkeerneqassaaq.

Pinerluttulerinermi suliani nassuiaatinik immiussisoqarsinnaalernera ilaatigut inuit pisinnaatitaaffii pillugit ilisimatusarfimmit (Institut for Menneskerettigheder) pitsaasutut nalilerneqartoq Inatsisinut ataatsimiititaliamit maluginiarneqarpoq.

Taamatuttaaq Inatsisinut Ataatsimiititaliamit maluginiarneqarpoq ilaatigut Nunatta Eqqartuussisuuneqarfianit kiisalu Kalaallit nunaanni Eqqartuussivimmit naatsorsuutigineqartoq nipimik immiussisinnaalerneq nunap immikkoortuini eqqartuussivinni pinerluttulerinermi sulianik suliarinninnermut piffissamik atorqeartartumik sivikillisaqaataasinnaassasoq.

Teknikikkut atortulersuutitigut iluarsiiisut oqalutseqarluni ingerlatsisinnaanermik ajornarunnaarsitsisoq piunasaqaataasoq ilaatigut Nunatta Eqqartuussisuuneqarfianit aamma Kalaallit nunaanni Eqqartuussivimmit tikkuarneqarpoq.

Tamanna inatsisissatut siunnersuutikkut piareersimaffigineqarpoq, tassami siunnersuummi nassuiaatinik immiussisinnaanermut aalajangersakkat aatsaat atortulersuutitigut piunasaqaatit naammassineqarpata atortulersinneqassapput.

Nassuiaataasunik immiussat peqatigitillugu apeqqutigineqartunik, akissutigineqartunik oqalutsillu taakkunannga nutserinerinik imaqaartussaaneri inatsisissatut siunnersuummut nassuiaatitigut piunasaqaataatinneqarpoq.

1.2. Pasisanit inuup sananeqaataanik, dna-mik tiguisarneq

Politiit inuup sananeqaataanik dna-mik nalunaarsuiniarlutik dna-mik tiguisinnaanerannut piunasaqaatit inatsisissatut missingiutikkut qasukkarneqarput.

Malittarisassat ullumikkut atuuttut malillugit pasisamit timimik misissuineq (tassani aamma qisermik misiligummik tigusineq) aatsaat pineqartup inatsimmik peqqarniitsumik unioqqutitsisimaneranik *tunngavissaqartumik pasitsaassisoqarsimatillugu* pisinnaavoq.

Inatsisissatut missingiutip nassataraa pasitsaassisoqarsimanissaanik piunasaqaatip qasukkarneqarnera, taamaalilluni pineqartoq inatsisunik peqqarniitsumik unioqqutitsisimanermut “naleqquttumik tunngavissaqartumik pasitsaanneqarpat” dna-mik nalunaarsuiffimmi nalunaarsugassatut aammik qisermilluunniit misiligutitut tiguisoqarsinnaalerluni.

Matumani inatsimmik peqqarniitsumik unioqqutitsineq ima paasineqassaaq; tassa inatsimmik unioqqutitsineq sunaluunniit pineqaatisseeriaaseq malillugu akiliisitaanermi sakkortunerusumik pineqaatissiisutaanissaa naatsorsuutigineqarsinnaasoq. Matumani inuit assersuutigalugu piunasaqaatitalerlugu utaqqisinneqartumik pineqaatissinneqarnissaat, inuiaqatigiinnut kiffartuussinnermut pineqaatissinneqarnissaat imaluunniit

pineqaatissinneqarsimasunik inissiisarffimmiittussanngorlugit pineqaatissinneqarnissaat naatsorsuutigineqartumik inatsimmik unioqqutitsisimanermit “naleqquttumik tunngavissaqartumik pasineqartut” pineqarput.

Malittarisassat ullumikkut atuuttut malillugit pasisap timaanit misiligummik tigusinikkut akuliunneq paasiniaanermut aalajangiisuusumik pingaaruteqarsorineqarpat aatsaat pisinnaavoq.

Dna-mik nalunaarsuiffimmi nalunaarsugassatut aammik qisermilluunniit misiligutitut tigusernermut tunngatillugu piumasaqaatip taassuma atorunnaarnera inatsisissatut missingiutip nassataraa.

Kiisalu malittarisassat ullumikkut atuuttut malillugit qisermik misiligutitut tiguisoqarnissaanik piginnaatitsissummik tunniussisoqarnissaanik aalajangiisussaasoq tassaavoq eqqartuussivik¹. Taamaalilluni piumasaqaatit naammassineqarsimanerannik eqqartuussivik nakkutilliisuvoq.

Piginnaatitsissutip taassuma politiinut nuunneqarnera inatsisissatut missingiutip nassataraa. Taamaalilluni siunnersuut ilusimisut iluseqarluni akuersissutigineqassapat, qanoq qisermik tiguisiffiginnissinnaanermut piumasaqaataasut naammassineqarsimatigineri pillugit oqartussaasumit attuumassuteqanngitsumit naliliisussaqaartassanngilaq.

Tamanna pasisap inatsisitigut illersugaaneramik annikillisaataasutut oqaatigineqarsinnaavoq – ingammik DNA-mik nalunaarsuiffimmi inassisimanerup ukiut aalajangersimasumik amerlassusillit qaangiunneranni aatsaat peerneqartarnera eqqarsaatigalugu², aamma pisuni pasisap unnerluutigineqannginnerani imaluunniit pasisap pinngitsuutitaanerani.

Inatsisissatut missingiut tamatuma saniatigut allannguummik allamik nassataqarpoq, tassalu politiit, peqqinnissaqarfimmi sulisunik peqataasoqanngikkaluortoq qisermik misiligummik tiguisinnaatitaalernerat.

Inatsisissatut missingiummut nassuiaatini allassimavoq, dna-mik misiligutinik tiguisarnermik eqqussinikkut politiit misissuinissamut periarfissaasa pitsaanerulernissaat siunertarineqartoq, taamaattumillu ilaatigut kinguaassiutitigut atornerluinernut Naalakkersuisut periusissiaannut (‘Killiliisa’-mik taaguuteqartumut) atasutut isigineqarsinnaasoq.

Tassungali atatillugu maluginiassallugu tunngavissaqarpoq siunnersuut malillugu, inuk inatsisinik unioqqutitsinermut pineqaatisseeriaaseq malillugu akiliisitaanermit sakkortunerusumik pineqaatissiisutaasinnaasumut naapertuuttumik tunngavissaqartumik

¹ Tamanna pasisamit taassumunngalu illersuisunngortitaasimasinnaasumit allakkatigut akuersissuteqartoqarsimanngippat

² Dna-mik misiligut aatsaat inuup pasisaasimasup 80-iliinerani nalunaarsuiffimmit peerneqassaaq. Pineqartoq pinngitsuutinneqarpat imaluunniit politiit unnerluutigisassanngortitsinermik taamaatitsiinnarpata paasissutissat pineqartut ukiut qulit qaangiunneranni peerneqassapput.

pasitsaanneqarpat dna-mik misiligummik tigusisoqarsinnaassammatt. Taamaalilluni dna-mik tigusiffiginnissinnaanermik periarfissiineq kinguaassiutitigut atorneerluinernut imaluunniit inoqammik ulorianartorsiortitsilluni pinerluutinut atorneqartussanngorlugu killilerneqanngilaq.

Taamatuttaaq maluginiassallugu tunngavissaqarpoq, paasissutissat dna-mik nalunaarsuiffimmi pigineqartut inatsisinik unioqqutitsinernik sunilluunniit paasiniaanermut atatillugu politiit atorneqarsinnaassammata, tamatumani aamma inatsisinik unioqqutitsinernik taamaallaat akiliisitaanermik pineqaatissinneqaataanissaat naatsorsuutigineqartunik.

Taamaalilluni pasisamit dna-mik tigusisinnaanermut periarfissiineq siunnersuutigineqartoq suliani kinguaassiutitigut kanngutsaatsuliornermut tunngassutilinni sunniuteqarsinnaavoq, taakkununngaannarli killilerneqarani.

Siullermeerinninnermi oqallinneq aallaavigalugu – politiit dna-nik nalunaarsuiffiannut dna-mik misiligummik tigusinissamut nalunaarsuinissamullu *periarfissaareersumik* annertusaanermik siunnersuutip nassataqarnera erseqqissaatigeqqissallugu tunngavissaqarpoq. Politiit aamma inatsisit atuuttut malillugit sulianik pineqaatissiseeriaaseq malillugu akiliisitaanermi peqqarniinnerusumik pineqaatissiissutaasinnaasunik paasiniaanermi atatillugu - eqqartuussiviup akuersissuteqarneratigut - misiligummik tigusinissamut periarfissaqarput. Misiligitillu tigusat politiit dna-nik nalunaarsuiffiannut ilanngutsinneqartarlutik.

Malittarisassalli atuuttut malillugit piumasaqaataaginnarpoq politiit eqqartuussiviup akuersissutaanik pissarsiniarnissaat, pineqartup tunngavissaqartumik pasitsaanneqarsimanissaa taamatullu dna-mik misiligummik tigusinerup paasiniaanermut aalajangiisuusumik pingaaruteqarsorineqarnissaa.

Eqqartuussiviup akuersissuteqartussaanerata atorunnaarnera aamma aalajangiisuusumik uppersaataanissaanik piumasaqaatip atorunnaarnera inatsisissatut missingiutip nassataraa taamatullu pasitsaassaqaartussaanermik piumasaqaatip qasukkarneqarnera.

Allannguutit siunnersuutigineqartut politiit tungaannit kissaataasumik tunngaveqartut Inatsisinut Ataatsimiititaliap maluginiarpa, taamatullu malittarisassat maanna Danmarkimi atuuttuusut taakku assigigaat.

Inatsisinut Ataatsimiititaliap aamma maluginiarpa timimik misissuisarnermi allannguutissatut siunnersuutigineqartumut Nunatsinni Illersuisuuneq, Nunatsinni Eqqartuussissuserisut kiisalu Kalaallit Nunaanni Illersuisut Peqatigiiffiat mianersuutiginneqquisut.

Kiisalu Inatsisinut Ataatsimiititaliamit maluginiarneqarpoq inatsisissatut siunnersuummik suliaqarnermi Inatsisinik atuutsinermut ministeriaqarfimmit pingaartinneqarsimasoq pasitsaassaqaartussaanermik piumasaqaat qasukkarneqartoq inussat ipaannik tigusisarnermut tunngatillugu atuuttuusumut naapertuuttoq, kiisalu politiit eqqartuussisumit akuersissummik

pissarseqqaaratik qisermik tiguisinnaanissaannik siunnersuutaasup assersuutigalugu suliani imigassartorsimalluni qamutininik motoorilinnik ingerlatsisimanermut tunngasuni aammik tiguisarnermut tunngatillugu ullumikkut atuuttunut naapertuunnera. Aamma pisuni dna-mik misiligummik tigusinerup paasiniaanermut aalajangiisuusumik pingaaruteqartut nalilerneqarsinnaanngiffigisaani politiit DNA-mik tiguisinnaanissaannik siunnersuutigineqartumut tunngatillugu, paasiniaanermut aalajangiisuusumik pingaaruteqarnissamik piumasaaqatip suliani unnerluussummik akuersissutiginnilluni nassuerutiginniffiusuni aallaavittut naammassineqarnavianninnera Inatsisunik atuutsitsinermut ministeriaqarfimmit pingaartinneqarsimavoq.

1.3. Kalaallit Nunaanni Eqqartuussivimmi eqqartuussisut amerlineqarnissaat, kiisalu Nunatta Eqqartuussisuuneqarfiani aamma Kalaallit Nunaanni Eqqartuussivimmi utaqqiisaasumik eqqartuussisunik toqqaanissamut periarfissap annertusineqarnera.

Kalaallit Nunaanni Eqqartuussivimmi eqqartuussisumik allamik ataatsimik toqqaasinnaaneq inatsisissatut siunnersuummut missingiutikkut pisariaqartitsineq naapertorlugu tunngavissinneqarpoq, taamaalilluni siunissami Kalaallit Nunaanni Eqqartuussivimmi marlunnik eqqartuussisoqalerluni.

Tamatuma piffissap suliassanik suliarinninnermut atorneqartup sivikillisinneqarneranik nassataqarnissaa naatsorsuutigisariaqarpoq peqatigitillugulu najukkami eqqartuussisut najukkamilu eqqartuussisunngorniartut piginnaasaannik annertusaanarluni Kalaallit Nunaanni Eqqartuussiviup iliuusaanik nukittorsaalluni.

Aammattaaq Nunatta Eqqartuussisuuneqarfiani Kalaallillu Nunaanni Eqqartuussivimmi utaqqiisaasumik eqqartuussisunik toqqaasinnaaneq inatsisissatut siunnersuutikkut annertusineqarpoq.

Aalajangersakkat atuuttut malillugit Kalaallit Nunaanni Eqqartuussivimmi aamma Nunatta Eqqartuussisuuneqarfiani atorfimmik inuttassarsiuussinermi imaluunniit aalajangersimasumik eqqartuussisup pisinnaannginnerani utaqqiisaasumik eqqartuussisussamik ivertitsisoqarsinnaareerpoq.

Taamaallaat ukiumut ataatsimut utaqqiisaasumik ivertitsisinnaaneq pingaarnertut najoqqutaavoq, taamaattorli pisinnaannginnermut napparsimaneq pissutaatillugu piffissamik killiliisoqanngilaq.

Pisinnaannginnermut pisortani atuuffimmik allamik isumaginninneq pissutaatillugu piumasaaqatit erseqqinnerusut malillugit utaqqiisaasumik ivertitsineq katillugit ukiuni pingasuni sivissusilimmi ukioq ataasikkaarlugu sivitsorneqarsinnaavoq. Sivitsuinissamut pissutsit immikkut illuinnartut pissutissaqartitsisussaanagerat piumasaaqatit ilagaat kiisalu utaqqiisaasumik ivertinneqartup eqqartuussisutut toqqaarneqarsimasuunissaa.

Inatsisissatut siunnersuutikkut utaqqiisaasumik ivertitsineq katillugit ukiuni pingasuni ukioq ataasikkaarlugu sivitsorneqarsinnaalissaaq, tamanna aamma pisortani atuuffimmik isumaginninnerunngitsumik allamik tunngaveqarluni pisinnaannginneq pissuteqarpat.

Sivitsuinnissamut pissutsit immikkut illuinnartut pissutissaqartitsisuunissaat utaqqiisaasumilluunniit ivertinneqartup eqqartuussisutut toqqarneqarsimasuunissaa piumasagaataajunnaassaaq.

Utaqqiisaasumik ivertitsisinnaanerup annertusineqarnissaanik siunnersuut Kalaallit Nunaanni Eqqartuussivimmi eqqartuussisutut atorfiup inuttalerneqarniarnera piffissap ilaani ajornakusoortarnerata paasinarsisimaneranut atatillugu isiginiarneqassaaq.

Taamaalilluni inatsimmut allanguut atorfiit sivisunerusumik inuttassaaleqissunneqartarnerannik ajornartorsiummik iliuseqarfiginninnissamik siunertaqarpoq.

Aatsaat pisariaqartillugu utaqqiisaasumik ivertitsisoqartarnissaa piumasagaataavoq, tassani aamma eqqartuussisutut atorfiup inuttassarsiuunneqartup inuttassarsissussinnaanera ajornartoq paasinarsippat.

Eqqartuussisup aalajangersimasup pisinnaajunnaaqanera qaangiuppat imaluunniit eqqartuussisutut atorfik inuttassarsiuunneqartoq inuttalerneqarpat ivertitsigallarneq atorunnaassaaq.

1.4. Kalaallit Nunaanni Eqqartuussiveqarneq pillugu Siunnersuisoqatigiit, Kalaallit Nunaanni Pinerlutsaaliuinnermut Siunnersuisoqatigiit kiisalu Dommerudnævnelserådip (Eqqartuussisunik Toqqaasarnermut Siunnersuisoqatigiit) inuttalersugaanerat

Kalaallit Nunaanni Eqqartuussiveqarneq pillugu Isumasioqatigiissitat (Siunnersuisoqatigiit) inuttalersugaanikkut katitigaanerat inatsisissatut siunnersuummut missingiutikkut allangortinneqarpoq. Allanguineq siunnersuisoqatigiinnit kaammattuummut naapertuuppoq.

2017-imi Kalaallit Nunaanni illersuisuunermik, pinerluttulerinermi suliani ilaatigut illersuisunik ilinniartitsinikkut, siunnersuisarnikkut nakkutiginnikkullu sunniutilimmik illersuisoqarnerup isumagineqarnissaanik suliaqartussamik toqqaasoqarpoq.

Tamanna tunngavigalugu Kalaallit Nunaanni illersuisuunerup ilanngutsinneqarneratigut siunnersuisoqatigiit annertusaavigneqarnissaat siunnersuutigineqarpoq.

Aammattaaq Naalagaaffiup eqqartuussissuserisuanit Rigsadvokatimit naalagaaffiullu Aammattaaq Naalagaaffiup eqqartuussissuserisuanit Rigsadvokatimit naalagaaffiullu politiivinit Rigspolitiinit aallartitanik ilaasortaqalersitsilluni siunnersuisoqatigiit annertusaavigneqarnissaat siunnersuutigineqarpoq. Taamaalilluni siunnersuisoqatigiinni ilisimasatigut toqqammavinnik nukittorsaataaginnangitsumik aammattaaq

siunnersuisoqatigiit suliaannik malitseqartitsisarnermut sinaakkutinik annertusaataasumik justitsministeriaqarfimmi aqutsisoqarfiit qaffasinnerusut tamarmik siunnersuisoqatigiinni aallartitaqalissapput.

Kanukokap 2018-imi aasakkut atorunnaarsinneqarnera pissutigalugu Kanukokamit aallartitap “kommunit sinniisuutitamik”, Kalaallit Nunaanni kommunini suliaasaqarfinnik immikkut ilisimasaqartumik taarserneqarnissaa siunnersuutigineqarpoq. Kia kommunit sinniisuutitap toqqarneqarnissaa kommuninillu sinniisuutitap qanoq iliornikkut toqqarneqarnissaa Kalaallit Nunaanni Namminersorlutik Oqartussanit aalajangerneqassaaq. Tamatumani piumasagaataavoq kommuninit sinniisuutitap Kalaallit Nunaanni kommunini suliaasaqarfinnik immikkut ilisimasaqartuunissaa.

Kalaallit Nunaanni Eqqartuussiveqarnek pillugu Isumalioqatigiissitaq (siunnersuisoqatigiit) tamatuma kingorna 17-inik ilaasortaqaalissaaq: Nunatta eqqartuussisuunera, Kalaallit Nunaanni Eqqartuussivimmi eqqartuussisoq aqutsisuusooq, najukkami eqqartuussisoq, Kalaallit Nunaanni politimesteri, Kalaallit Nunaanni Pinerluuteqarsimasunik Isumaginnittoqarfimmi pisortaqaq, Kalaallit Nunaanni illersuisuuneq, eqqartuussissuserisoq ataaseq, illersuisoq ataaseq, ilisimatusarfimmi ilinniartitsisoq ataaseq, Kalaallit Nunaanni Namminersorlutik Oqartussaniit sinniisuutitap marluk, kommunimiit sinniisuutitaq kiisalu Inatsiseqarnermut Ministereqarfimmiit, Domstolsstyrelsimit, Pinerluuteqarsimasunik Isumaginnittoqarfimmut Pisortaqaarfimmit, Naalagaaffiup eqqartuussissuserisuanit aamma Naalagaaffiup politiivinit sinniisuutitap

Aammattaaq Pinerlutsaaliuinnermut Isumasioqatigiissitat (Siunnersuisoqatigiit) katitigaanerannik allannguummik inatsisissatut siunnersuut nassataqarpoq.

Kanukokamit siunnersuisoqatigiinnut aallartitaq “kommunit sinniisuutitamik”, Kalaallit Nunaanni kommunini suliaasaqarfinnik immikkut ilisimasaqartumik taarserneqarnissaa siunnersuutigineqarpoq. Aamma tamatumani kia kommunit sinniisuutitap toqqarneqarnissaa kommuninillu sinniisuutitap qanoq iliornikkut toqqarneqarnissaa Kalaallit Nunaanni Namminersorlutik Oqartussanit aalajangerneqassaaq. Tamatumani piumasagaataavoq kommuninit sinniisuutitap Kalaallit Nunaanni kommunini suliaasaqarfinnik immikkut ilisimasaqartuunissaa.

Kiisalu Dommerudnævnelserådip (Eqqartuussisunik toqqaasarnermut Siunnersuisoqatigiit), Kalaallit Nunaanni Eqqartuussivimmi eqqartuussisumik inuttaliiniarnermi kiisalu Nunatta Eqqartuussisuuneqarfiani eqqartuussisumik toqqaaniarnermi Domstolsstyrelsimut inassuteqartartup inuttalersugaanikkut allanngortinneqarneranik inatsisissatut siunnersuut nassataqarpoq. Dommerudnævnelserådi Kalaallit Nunaanni Eqqartuussivimmi imaluunniit Nunatta Eqqartuussisuuneqarfiani eqqartuussisutut atorfimmu innuttaliiniarluni suliani atuuffeqarpoq³, taamatullu ilaatigut inuiaqatigiinnit sinniisussanik marlunnik toqqaaniarnermi.

³ Kalaallit Nunaanni eqqartuussisarnermik inatsimmi § 13, imm. 1, nr. 3-4, malillugu

Pisortanit sinniisuutitat taakku marluk aamma najukkami eqqartuussisutut atorfinnut atorfinitsinissaq pillugu aalajangiinerni kiisalu najukkani eqqartuussisutut atorfinitsitassanik Domstolsstyrelsimut innersuussuteqartarnermi peqataasassapput⁴.


Pisortanit sinniisuutitat taakku marluusut aappaat maannamut Naalakkersuisut inassuteqareernerisigut ivertinneqartarsimavoq aappaalu KANUKOKA-p maanna atorunnaarsimasup inassuteqarneratigut ivertinneqartarsimavoq. KANUKOKA-p innersuussisinnaatitaanera inatsisissatut siunnersuutikkut Naalakkersuisunut nuunneqarpoq, taamaalillutik pisortanit sinniisuutitat tamarmik siunissami Naalakkersuisut inassuteqareernerisigut ivertinneqartalerlutik. Taamaattorli piunasaqaataavoq sinniisuutitap ataatsip kommuninut tunngassuteqartut immikkut ilisimasaqarfigissagai.

4. Inatsisinut ataatsimiititaliap inassuteqaataa


Siunnersuut akuerineqassasoq ataatsimiititaliap isumaqatigiittup inassutigaa.

Ataatsimiititaliap taama oqaaseqaateqarluni siunnersuut aappassaaniigassanngortippaa.


⁴ Kalaallit Nunaanni eqqartuussisarnermik inatsimmi § 10, imm. 1, nr. 1-2, malillugu




Anders Olsen
Siulittaasoq,
Siumut



Sofia Geisler
Inuit Ataatigiit



Justus Hansen
Demokraatit



Stine Egede
Inuit Ataatigiit



Aleqa Hammond
Nunatta Qitornai